

Siunnersuummut nassuiaatit

Nassuiaatit nalinginnaasut

Imaasa allattorsimaffiat

1. Aallaqqaasiut	1
2. Siunnersuummi immikkoortut pingaarnertit	2
3. Pisortanut aningaasaqarnikkut allaffissornikkullu sunniutaasussat	9
4. Inuussutissarsiortunut aningaasaqarnikkut allaffissornikkullu sunniutaasussat	10
5. Avatangiisinut, pinngortitamut inuillu peqqissusaannut sunniutaasussat	10
7. Innuttaasunut sunniutaasussat	10
8. Sunniutaasussat annertuut allat	11
9. Oqartussanut kattuffinnullu il.il. tusarniaaneq	11
Siunnersuummi aalajangersakkanut ataasiakkaanut nassuiaatit	12

1. Aallaqqaasiut

Siunnersuut pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaannut teknikkikkut allannguutinik arlalinnik imaqarpoq.

Pisortanut akiitsut annertussusaasa annikillisinnissaannik ataatsimoortumik ilungersuuteqarnermut ilaatillugu akiliisitsiniartarnermut suliassaqaqfimmi sunniuteqarluarnerulersitsinissat erseqqissaanissallu arlallit siunnersuutigineqarput. Siunnersuutini pingaarnertut siunnerfigineqarpoq suliassaqaqfimmi akileraaruseriffiup akiliisitsiniarnissamat periarfissaannik pitsanngorsaannissaq, tassani innuttaasut inatsisitigut isumannaatsuunerat annikillisinneqarani.

Sunniuteqarluarnerulersitsinissamat siunnersuutit taakkua ilagaat akiliisitsiniartarnermut inatsimmi § 1, imm. 2-p, inatsisit allattorsimaffiannik aammalu inatsisip atuuffissaannut killissaliinermik imaqartup, nutarterneqarnissaa. Kisiannili allattorsimasut sivisunerusumik nutarterneqarsimangillat, tassami § 1, imm. 2-p kingullermik allanngortinneqarnera 2008-mi ingerlanneqarmat. Tamatuma sunniutigaa allattorsimasut atuuttut amigarnerat. Siunnersuummi tamanna iluarsineqarpoq, tassami allattorsimasut atuuttut iluarsaanneqarmata, tassani ilaatigut inatsisit amerlanerusut ilanngunneqarlutik.

Siunnersuutip tassunga tunngasortaani, akiliisitsiniartarnermut inatsimmi § 2-p annertusitinneqarnissaa pillugu siunnersuummut peqatigitillugu, akileraaruseriffik sunniuteqarluarnerujussuarmik pisortat akiligassiissutaannik akiliisitsiniarnissaa, ullumikkut

pisartunit ajornannginnerulersinneqartussaavoq. Ullumikkut akiligassiissutit akileraaruseriffiup tigusai arlallit akilersinniarneqarnerat eqqartuussiviit ikiortigalugit ingerlanneqartarput. Tamatumani akileraaruseriffimmi atortoqarani suleriaatsit isumalluutinik atuiffiusartut akuutinneqartarput, taamatullu eqqartuussivinni isumalluutit killeqartut atorineqartarlutik. Tamatuma saniatigut nunap karsia tamatumunnga atasumik toqqaannartumik aningaasartuuteqartinneqartarpoq, suliaakkiissutinut tamaginnut eqqartuussivimmut akitsuutitut ilusilimmik.

Sunniuteqarluarnerulersitsinissap ilungersuutigineqarneranut nangissutigalugu siunnersuutigineqarpoq ilanngaatiginnissinnaatitaaneq annertusitinneqassasoq, akiligassiissutit ullumikkornit ingerlaannartumik ingerlanneqarnerulersumik akilersinniarneqarsinnaanngorlugit. Ullumikkut suliasani amerlasuuni akiligassiissutit atortoqarani suleriaatsit isumalluutinik atuiffiusussat atorlugit akilersinniarneqartariaqartarput. Ilangaatiginnissinnaaneq sakkussaavoq, ukiumoortumik akileraarutit sippuutaannik tunniussisoqartussanngornerani, akileraaruseriffiup angusaqarfiulluurtumik atortagaa. Siunnersuutigineqarpoq aamma akiligassiissutinik pisortat akiliisarnerat pineqartunut ilaatilerlugu, sakkussaq taanna annertusitinneqassasoq. Taamaaliormi akileraaruseriffiup akiliisitsiniarnermik suliaqarnerata ilaa annertoq ingerlaannartunngortinneqarsinnaalissalluni.

Inuiaqatigiinni nalinginnaasumik, pingaartumillu akileraaruseriffimmi, ineriartorneq ingerlaannartunngortitsinerup digitalinngortitsinerullu tungaanut annertuumik ingerlavoq. Pisortat ingerlatsineranni oqartussanut aallaavigineqarpoq, aalajangiinerni nassiusisup atia allallugu atsiorneq allassimassasoq. Tamatumani atortoqarani sulianik ingerlatitsineq ilaatinneqartarpoq, suleriaatsit ingerlaannartunngortinnissaat sunniuteqarluarnerulersinnissaallu ajornakusuulersittarlugu. Taamaattumik siunnersuutigineqarpoq akiliisitsiniarnermut suliasaqarfimmi atsiornissamut piumasaqaatip ilaatinnginnissaanut Naalakkersuisut piginnaatinneqassasut. Tamatumani sulinerup ingerlanera annertunerusumik ingerlaannartunngortinneqarsinnaalissalluni.

2. Siunnersuummi immikkoortut pingaarnerit

2.1 Inatsisip atuuffissaannik nutarterineq

Siunnersuutigineqarpoq inatsisip atuuffissai nutarterneqassasut, taamaalilluni Inatsisartut inatsisai il.il. attuumassutillit, taakkualu allanngortinneqarneri 2008-miilli, kingullermik taamaaqataanik nutarterisoqarmat, akuerineqartut, tassani ilaatinneqalerlutik.

2.2 Pinngitsaaliissummik akiliisitsiniarnissamut piginnaatitaanerit nutarterneqarnerat annertusitinneqarnerallu

Kalaallit Nunaanni Kalaallit Nunaanni eqqartuussisarnermik inatsimmi pinngitsaaliissummik akiliisitsiniarneq pillugu maleruagassat maani nunatsinni akiliisitsiniarnermut suliasaqarfimmut aammalu akiligassiissutit suut pinngitsaaliissummik

akilersinniarneqarsinnaanerannut, sinaakkutissaliipput. Akiligassiissutit akileraaruseriffiup tigusartagaasa amerlanerpaartai, pinngitsaaliissummik akiliisitsiniartarnek pillugu eqqartuussisarnermik inatsimmi maleruagassani toqqaannartumik pineqartunut ilaatinneqangillat. Taamaattumik akiligassiissutit taakkua aallaaviatigut eqqartuussiviit ikiortigalugit pinngitsaaliissummik akilersinniarneqartarput. Suliap ingerlanera taanna eqqartuussivinnut taamatullu akileraaruseriffimmut isumalluutinik aningaasartuutinillu annertuumik atuiffiusarpoq.

Taamaattumik sunniuteqarluarnerulersitsinissap ilungersuutigineqarneranut ilaatillugu siunnersuutigineqarpoq, akileraaruseriffimmut pinngitsaaliissummik akiliisitsiniarnissamut piginnaatitsineq annertusitinneqassasoq. Taamaattumik siunnersuutigineqarpoq akiligassiissutit maannakkut eqqartuussiviit akuliutsinneqarnissaannik pisariaqartitsiviusartut, taamatut akuutitsiviunngitsumik pinngitsaaliissummik akilersinniarneqarsinnaalissasut. Taamaalilluni piginnaatitsinerit aamma sullissinernut pisortanit sullississutigineqartartunut (nunaminertamik atugassiineq, containerinik attartorneq, ininik inuussutissarsiorfiusussanik attartorneq il.il.) akiliinernut akiligassiissutitut aamma atuutsilerlugit annertusitinneqarput. Tamatuma saniatigut aningaasarsianik annertunaarlugit tunniunneqarsimasunik utertillugit akiliinissamik pisortat piumasagaatai pineqartunut ilaaterlugit aamma piginnaatitsinerit annertusitinneqassasut, siunnersuutigineqarpoq.

Akiligassiissutit sorliit suliassaqaarfinit akisussaaffigilerlugit tiguneqarsimasuneersut, akileraaruseriffiup akiliisitsiniartartuinit eqqartuussiviit ikiortiginagit pinngitsaaliissummik akilersinniarneqarsinnaanersut, Kalaallit Nunaanni eqqartuussisarnermik inatsimmi § 598, imm. 3 malillugu Inatsisartut inatsimmi aalajangersinnaapput. Piginnaatitsissut taanna akiliisitsiniartarnermut inatsimmi § 2-mi atorneqarpoq. Taamaalilluni Kalaallit Nunaanni eqqartuussisarnermik inatsimmi allassimasut saniatigut akiligassiissutit sorliit akileraaruseriffiup akiliisitsiniartartuinit pinngitsaaliissummik akilersinniarneqarsinnaanersut, erseqqinnerusumik allassimasunik, aalajangersagaq imaqarpoq.

Siunnersuutip atuunnerani akiligassiissutaasartussat nutaat arlallit akiligassiissutitut akileraaruseriffimmit akilersinniarneqarsinnaasunut allattukkanut ilanngunneqarput. Siunnersuut akileraaruseriffiup akiliisitsiniarnermik suliaqarneranut sunniuteqarluarnerulersitseqataassaaq aammalu eqqartuussivinni isumalluutit allanut atorneqarsinnaalersissinnaallugit. Siunnersuummi isumalluutinik atuiffiusumik suleriaaseqarnissaq pisariaarutsinneqassaaq, taamatullu eqqartuussivimmut akitsuutinut aningaasartuutissanik sipaaruteqarnermik malitseqassalluni, kisianni tamanna allatigut innuttaasut inatsisitigut isumannaatsuunerannut sunniuteqarnerlussanani. Kisiannili sunniuteqarluarnerulersitsinissamut siunnersuutigineqartut inatsisitigut isumannaatsuutitsinermut pitsannorsagaataassasut tunngavilersuutigineqarsinnaassaaq, tassami taamaaliornermi suliassani arlalinni, ullumikkorniit sukkanerusumik suliassat sularineqartalissammata.

Tamatuma saniatigut aalajangersakkat atuuttut ilusaannik allangortitsinissaq siunnersuutigineqarpoq, taamaalilluni inatsisinut innersuussutigineqartunut allattukkat, tamatumunnga taarsiullugu immikkoortukkaani allatorneqarlutik, taamaaliormi inatsisilioriaatsimut malittarisassat atuuttut malinneqarlutik.

2.3 Aningaasat aningaasarsianit unerartinneqartut atorlugit naatsorsuilluni akiliisarnerit assigiissaarneqarnerisa malitsigisaanik sunniutaasumik iluarsineq

Pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaata allangortinneqarnera pillugu Inatsisartut inatsisaanni nr. 13, 3. juni 2015-imeersumi akileraaruseriffimmit ingerlanneqartumik aningaasarsianik unerartitsinissamut naatsorsukkanik akiliinissamut killigititaq nutaaq ilanngunneqarpoq. Inatsisartut 2013-imi ukiaanerani ataatsimiinneranni (UKA2013/100) akileraarutitut A-nut aammalu iluanaarutisianit akileraarutitut naatsorsukkanik akiliinissamut piffissamut killigititap kinguartinneqarnissaata akuerineqarnera pissutigalugu allangortitsisoqarpoq.

Kisiannili allangortitsinermut inatsimmi 3. juni 2015-imeersumi, Inatsisartut inatsisaanni § 3, imm. 6-imi aningaasarsianik unerartitsinissamut naatsorsuilluni akiliinissamut § 3, imm. 1 malillugu ingerlanneqartumut aalajangersagaqareenera, sillimaffigineqarsimangilaq. Tamanna paatsiveerutsitsisinnaavoq paatsoortitsisinnaallunilu, tassami § 3, imm. 6-imi aalajangersakkami 2013 sioqqullugu naatsorsuilluni akiliinissamut killigitat malinneqarmata.

Siunnersuummi § 3, imm. 6 atorunnaarsillugu, taamatut naapertuutinngitsoqarnera iluarsiniarneqarpoq. Taamaalilluni siunnersuummi taamaallaat sulisitsisut aningaasarsianik unerartitsinissaannut nalunaarutiginninnissamut naatsorsuillunilu akiliinissamut killigititaq, Inatsisartut inatsisaanni § 3 a-mi allassimasoq aammalu killigitat taakkua assingi akileraarutitut A-nut il.il. atuuttut malillugit ingerlanneqartoq, ataasiinnangussaaq.

2.4 Ilanngaatiginnissinnaatitaanerup annertusitinneqarnera

Tamatuma saniatigut siunnersuut ilanngaatiginnissinnaatitaanerup annertusitinneqarnissaanik imaqarpoq, tassami ilaatigut siunnersuutigineqarpoq akiligassiisutaasartut, ilanngaatiginnikkut matussuserneqarsinnaasut, amerlassusai annertusitinneqassasut, ilaatigullu ilanngaatiginnissinnaatitaaneq aamma akiligassiisutitik il.il. akiliinernut atuutsilerlugu, annertusitinneqassasoq.

Akiliisitsiniartarneq isumalluutitik atuiffiungaatsiartarpoq aammalu suliap ingerlasarnera pisariulluni, akileraaruseriffimmi suliassanik sularinninnermi iliuseqarnissarpasuit pisariaqartarlutik. Akileraaruseriffiup sakkussatut atorsinnaasaa akuttunngitsumik atorneqartartoq sunnuteqarluartorlu tassaaavoq ilanngaatiginnittarneq. Tassalu illuatungeriit marluk imminnut aningaasanik akiitsoqarfigalutik aammalu aappaata aappani nalunaarfigalugu illuatungeriit akornanni akiitsut tamakkiisumik ilaannaarsumilluunniit akilerneqarneranni piumasaqaatit

imminnut naligiilersut, pisoqarnerani. Sakkussaq nalinginnaasumik pigisanut nalilinnut inatsisini ilaavoq aammalu ukiorpassuarni eqqartuussivimmi suleriaaserineqarluni ineriartortinneqarsimalluni. Ilanngaatiginninnissamut piumasaqaat qitiusoq tassaavoq illuatungeriit akornanni illugiilluni inissisimaneq.

Sakkussaq ilanngaatiginnittarnermut assingusooq taaneqartartoq ilanngaatiginnissinnaalerneq, pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaata atuutsinneqalernerani 1996-imi Kalaallit Nunaanni atuutsinneqalersooq, pisortat akiitsunik akilinngitsuukkanik akiliisitsiniartarnerannut taamaaqataanik sunniuteqarluartumik periaaserineqarpoq. Ilanngaatiginnissinnaalernermi illuatungeriinnissamut piumasaqaat atuukkunnaarpoq, tassami alla illuatungeriit ilanngaatiginnissinnaatitaaneranni ilanngussinnaalermat. Ilanngaatiginnissinnaatitaanermi ilanngunnermi ilanngaatiginnissinnaalerneq taanna ullumikkut Namminersorlutik Oqartussat akileraarutit sippuutaannik tunniussinerannut killeqartinneqarpoq, taamatullu ilanngaatiginnissinnaatitaanermi ilanngunneq taamaallaat akiligassiissutinik erseqqinnerusumik killilerneqartunik matussusiiinneqarsinnaammat.

Ilanngaatiginnissinnaatitaanermi ilanngunneq taamaalilluni marlunnik immikkoortunik imaqarpoq: Immikkoortoq siulleq tunniussinerit sorliit ilanngaatiginniffiusinnaasut erseqqinnerusumik killissalernerneqarnerannut tunngassuteqarpoq, immikkoortup aappaa akiligassiissutit sorliit ilanngaatiginniffiunissaannut periarfissiiviunerannut tunngassuteqarluni. Siunnersuummi immikkoortut marluusut imarisaannik atuinnissamut periarfissanik annertusititsiniartoqarpoq.

Immikkoortumut siullermut tunngatillugu, tunniussinerit immikkoortut allat ilanngutsillugit, ilanngaatiginnissinnaatitaanerup annertusitinneqarnissaa siunnersuutigineqarpoq. Taamaalilluni siunnersuutigineqarpoq, akileraarutit sippuutaannut tunngatillugu ilanngaatiginninnissamut periarfissat atuuttut saniatigut, pisortat akiligassiissutinik akiliinerannut atatillugu tunniussinerni ilanngaatiginnittoqarsinnaalissasoq.

Immikkoortup aappaanut tunngatillugu aammattaaq akiligassiissutinut tunngasortaani, akiligassiissutaasartut ilanngaatiginninnikkut matussuserneqarsinnaasut allassimaffiat annertusitillugu, ilanngaatiginnissinnaatitaaneq annertusitinneqassasoq siunnersuutigineqarpoq.

Allaffissornikkut sakkussamut pisariitsumut ilanngaatiginninnertut ilanngaatiginnissinnaalernertullu iluseqartumut taarsiullugu atorneqarsinnaasooq tassaavoq, tunniussinernit aalajangersimasunit pisortat ingerlattagaannit (assersuutigalugu akiligassiinerit tunniussivigineqarnerat) taarsiititsilluni akiliisitsineq. Tassani pineqarpoq akiliisitsiniarnermi iliuuserineqartartoq isumalluutitigut oqimaatumik ingerlanneqartartoq, Kalaallit Nunaanni eqqartuussisarnermik inatsit tunngavigalugu ingerlanneqartartoq. Taarsiititsilluni akiliisitsineq aningaasanngorlugit ingerlanneqarsinnaavoq taamatullu pigisat soorlu biilit, umiatsiat pigisallu aalaakkaasut taartigitinneqarsinnaallutik. Taarsiititsilluni akiliisitsisarneq pillugu maleruagassani piumasaqaatit arlallit

naammassineqarsimasussat allassimapput. Piumasaqaatini taakkunani siunertaavoq innuttaasut inatsisitigut isumannaatsuunerannik qulakkeerinissaq, tassami sioqqutsisumik nalunaarutiginninnissaq piumasaqaatigineqarmat, taamatullu suut taartigitillugit akiliisitsisoqarsinnaanersoq killilersuutinik atuuttoqarluni. Taamaattoq pisuni aalajangersimasuni nalunaarutiginninnissaq pillugu piumasaqaat atuutsinnginneqarsinnaavoq, assersuutigalugu nalunaarutiginninnginneq eqqarsarnartoqanngitsutut nalilerneqarpat imaluunniit akiitsoqartup akiitsuinut matussusiinissamut periarfissat taamaangippat annertuumik ajorseriartinneqassappata.

Tunniussinerni taarsiititsilluni akiliisitsineq sakkussaavoq, ilanngaatiginnittoqarsinnaatinnagu imaluunniit ilanngaatiginnissinnaalernermik atuinissaq periarfissaqartinnagu, akileraaruseriffimmit atornerqartartoq. Amerlanertigut tunniussinerni aalajangersimasuni taarsiititsilluni akiliisitsineq ingerlanneqarsinnaasarpoq, tassami aningaasarsianik, ikiorsiissutinik, tapersiissutinik assigisaannilluunniit tunniussinerni taarsiititsilluni akiliisitsisoqartanngimmat. Taamaattumik akiitsoqartoq ersarissumik aallaaviatigut annikitsumik angerlarsimaffimmini attassisinnaanissamut aningaasasaqartinneqartarmat, tassami taamaangippat akileraaruseriffik tunniussinerup ilaanik taarsiititsilluni akiliisitsivigineqartumik killiliissammat. Nalunaarutiginninneq aamma atornerqanngissinnaasarpoq, tassami amerlanertigut tamanna eqqarsarnartoqartanngimmat imaluunniit akiitsut taamaangippat matussuserneqarsinnaanngissinnaallutik.

Isumaliutersuutini taamaattuni ataasiakkaatigut atortoqarani suliassamik suliarinninnissaq pisariaqarpoq, ilanngaatiginninnissamut ilanngaatiginnissinnaalernissamullu sanilliullugu, taarsiititsilluni akiliisitsinissaq allaffissornikkut oqimaatsumik sakkussanngortarluni. Taamaakkaluartoq pisortat akiligassiinermik piumasaqaat tunngavigalugu tunniussinerini taarsiititsilluni akiliisitsinissaq periarfissaqartussaammat, taamaattumik ilanngaatiginnissinnaatitaanerup tunniussinerit taakkorpiaat ilaaterlugit annertusitinnissaa eqqarsarnartoqartussaangilaq.

2018-imiilli kommunit aamma Namminersorlutik Oqartussat periaaseq Prisme atuutsilerpaat, taamaalillutik immikkoortortat tamarnik pisortat ataatsimoorlutik aningaasaqarnermi periaaseq ataaseq maannakkut atorlugu. Tamatuma kingunerisaanik tunniussinerit kommuninit imaluunniit Namminersorlutik Oqartussanit ingerlanneqartut, ingerlaannartumik suliap ingerlanerani akileraaruseriffimmi akiitsunut akilinngitsuukkanut periaatsimut atassuserneqarsinnaapput. Ingerlaannartumik suliap ingerlanera taanna akileraaruseriffimmi isumalluutinik pitsaanerulersitsissaaq, tassami sulisut atortoqarani suleriaaseqarnermiittut akiliisitsiniarnermik suliassanik suliarinnissinnaalersinneqarsinnaammata.

Inatsisissatut siunnersuut, akileraaruseriffiup sulineranik sunniuteqarluarnerulersitsinissaq pisariinnerulersitsinissarlu pillugit Naalackersuisut ungasissumut siunnerfeqarneranni ilaavoq. Kommunit aamma Namminersorlutik Oqartussat ilanngaatiginnissinnaatitaanerisa annertusitinneqarnerani, akileraaruseriffimmi atortoqarani suliassanik suliarinninnermi iliuusissanut

isumalluutiniq atuineq annikillisiinneqassaaq, tassani suliat ingerlaneri annertunerujussuarmik ingerlaannartunngortinneqarsinnaalissammata.

2.5 Akiligassiissutip annertussusaanut annikinnerpaaffissatut killissaliussap inatsimmi aalajangersarneqarnera

Tamatuma saniatigut siunnersuut annikinnerpaaffissatut killissaliussamik aammalu akiligassiissutit sinneruttut annikitsut isumakkeernissaannut killissamik, 2021-miilli aningaasanut inatsisini oqaasertaliussatut atuussimasumik, ilanngussinermik imaqarpoq. Siunnersuutigineqarpoq oqaasertaliussat taakkua najoqqutassami inatsimmi ilanngunneqassasut, taamaalillutik taakkua siunissami aningaasanut inatsimmi ilaatinneqanngissinnaalissallutik.

2020-mut ilassutitut aningaasaliissutininut inatsimmi oqaasertaliussaq, 100 koruunit inorlugit akiligassiissutiniq tigusaqartannginnissamut Naalakkersuisunut piginnaatitsiviusoq, ilanngunneqassasoq, Aningaasaqarnermut Akileraartarnermullu Ataatsimiititaliap akueraa, taamatullu Namminersorlutik Oqartussat akiligassiissutaasa 300 koruunit inorlugit annertussuseqartut tamarmik taamaatinneqarnissaannut Naalakkersuisut piginnaatinneqarlutik.

Aalajangiineq taanna taamanikkulli atuussimavoq, tassami ukiumoortumik aningaasanut inatsisini suliaasaqarfimmut 20-24-mut oqaasertaliussani piginnaatitsissuteqarneq sivitsorneqartarmat.

Siunnersuutigineqarpoq annikinnerpaaffissanut killiliussaq aamma taamaatitsinissamut killiliussaq pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaanni ilanngunneqassasut, taamaalillutillu ukiumoortumik aningaasanut inatsisinut attuumassuteqarunnaarsinneqassasut.

Taamaalilluni siunnersuummi inatsisitigut inissisimaneq atuuttoq inatsimmut aalajangersimasumut nuutinneqarpoq.

Kisiannili taamaatitsinissamut killissamut tunngatillugu siunnersuutigineqarpoq, taanna annertusititami ilanngunneqassasoq, tassami kommunit aamma Namminersorlutik Oqartussat nammineerlutik akiligassiissutitik 100 koruuninik annikinnerusunilluunniit annertussusilimmik akiitsut sinneqartut taamaatissinnaanerannut periarfissinneqarmata. Taamaaliornermi maannamut taamaatitsinissamut periarfissaasoq, aamma kommunit pineqartunut ilaatilerlugit, annertusitinneqarpoq.

2.6 Akiliisitsiniartarnermut suliassaqarfimmi attaveqaqatigiinnermi atsiornissamut piumasagaat

Sunniuteqarluarnerulersitsinissap ilungersuutigineqarneranut ilaatillugu siunnersuut tamatuma saniatigut Naalakkersuisut akiliisitsiniartarnermut suliassaqarfimmi atsiornertaqanngitsumik, atsiorneq maskiinamik issuarneqarsimasoq assigisaaluunniit atorlugu allakkianik atuutilersitsinissamut maleruagassanik aalajangersaanissamut piginnaatinneqarnerannik imaqarpoq.

Akilaraaruseriffik ullut tamaasa allakkanik allakkianillu amerlasoorpassuarnik nassiussuisarpoq. Allakkat taakkua ilai amerlasuut ingerlaannartumik sulianik ingerlatitsisarnerni, IT-programminit, akilaraaruseriffimmi isumalluutit sunniuteqarluarnerulersinnissaannut pitsaanerulersinnissaannullu, ikkussorneqarsimasunit, ingerlanneqartartuni, ilaatillugu nassiunneqartarput. Taamaalilluni allakkat akilaraaruseriffimmit nassiunneqartut tamakkernagit inummit allanneqarsimasarput. Kisianni allagarpassuit akilaraaruseriffimmi IT atorlugu periaatsinit ingerlaannartumik pilersitaasarput. Siunnersuummi piginnaatitsissutip, akilaraarutinut suliassaqaarfimmi pisartut assingalugit (akilaraaruserinermik ingerlatsineq pillugu Inatsisartut inatsisaanni § 56) akiliisitsiniartarnermut suliassaqaarfiup iluani allakkat atsiorneqarsimanissaannut piumasaaqammit ingerlaannartumik pilersinneqartut ilaatinnginnissaannut, atorneqarnissaa eqqarsaatigineqarpoq.

Pissusiviusoq taanna akiliisitsiniartarnermut suliassaqaarfimmi, suliassaqaarfiup ataatsimoortinneqarneraniilli annertuumik digitalinngorsaaffiusimasumi, pingaartumik atuuppoq. Digitalinngorsaaneq taanna Naalackersuisut pisortat ingerlatsinerannik nutarterinissamik kissaateqarnerannut naapertuuppoq, peqatigisaanillu akilaraaruseriffimmi isumalluutit suliassanut iluaqusiinerpaasussanut atorneqarnissaat qulakkeerneqassalluni.

Akilaraaruseriffiup nutarteriffigineqarnerani aamma digitalinngortitsivigineqarnerani akiliisitsiniartarnermut suliassaqaarfimmi suliat ingerlasarneri arlalippassuit ingerlaannartunngortinneqarput. Tassani suliat ingerlaneri, aammalu annertunerpaatigut inuk atilik akuutinnagu ataasiakkaatigut isummerfigineqartariaqanngitsut, siusinnerusukkat atortoqarani aammalu isumalluutinik annertuumik atuilluni isumagineqartarput. Suliat ingerlasarnerini taakkunani amerlasuuni ilanngaatiginninnissamut allakkatut, akiliinissamik eqqaasitsinertut, suliarni pineqartumut tusarniaanertut assigisaattullu ingerlanneqartarneri ilaatinneqarput. Ineriartorneq taanna inuiaqatigiinni kalaallini sumiiffinni allani, aammalu nunani allani sanilliuttakkatsinni annertoorujussuarmik takuneqartartoq, ukiorpassuarni suli ingerlaannartussaavoq.

Oqartussat suleriaasiinik ingerlaannartunngortitsisarnerup annertusiartornera taamaalilluni pisortat ingerlatsineranni nutaaliaasumi ilaalluinnarpoq, tassani pisortat isumalluutaat tamatumunnga taarsiullugu suliassanut ingerlaannartunngortinneqarnissamut naleqqutinngitsunut atorneqarsinnaalissallutik.

Inatsisissatut siunnersuummi sunniuteqarluarnerulersitsinissamut tassunga iluaqusiiniartoqarpoq, tassami allakkiani ingerlaannartunngortinneqarsinnaasuni atsiornissamut piumasaaqatip peerneqarnerani akilaraaruseriffimmi isumalluutit allanut atorneqarsinnaalissammata. Taakkua tamatumunnga taarsiullugu siunissami innuttaasunik ilitersuussinermut atorneqarsinnaassapput.

Inatsisitigut isumannaatsuutitsinissap, atsiornissaq pillugu piumasaaqammut tunngavigineqartup, mianerineqarnissaanik ajorseriartitsinermik siunnersuut kinguneqassasoq naliliisoqanngilaq.

Mianerisassat taakkua ilaatigut tassaapput, allakkat suminggaaneerfiat inummut akisussaasumut tutsinneqarsinnaassasoq, ilaatigut suliaq sulisumit suliamut attuumassuteqarpallaanngitsumit suliarineqarsimassanersoq takunissaanut innuttaasoq periarfissaqassasoq, ilaatigullu oqartussat sulinermi akisussaaffimmik inissiisinnaassasut. Naggataatigut atsiorneq missingiutip aammalu allakkat inaarutaasut assigiinngissutaattut isigineqartarpoq.

Allakkat ingerlaannartumik pilersinneqartut suliassanik suliarinnittartup sunniuteqarfiginngisaanik pilersinneqartarput, taamaattumik suliamut attuumassuteqarpallaarnerup aammalu sulinermi akisussaasuusup mianerineqarnissaa, allakkat inummit allanneqarsimasuuppata siunertarineqartartut assinginiq siunertaqaratik. Taamaaqataanik allakkat ingerlaannartumik pilersinneqartut missingiutitit ilusilerlugit nassiunneqarnaviannngillat.

Qanoq pisoqaraluarpalluunniit oqartussaq atuutsitsilersoq allakkanut nassiussorneqartussanut ingerlaannartumik allaganngortinneqartunut akisussaasuusaaq. Tamatuma saniatigut allakkat taakkua ilitersuissutaasunik allannertaqassapput aammalu attaveqarfissanut paasissutissanik imaqaassallutik, tiguisussap ilitersuisussarsiffigisinnaasaannik.

2.7 Namminersorlutik Oqartussanut ikaarsaarnerup kingorna inatsisip oqaasertaannik nutarterineq

Siunnersuut tamatuma saniatigut pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaata teknikkikkut iluarsineqarnerinik arlalinnik imaqarpoq. Namminersornerullutik Oqartussaniit Namminersorlutik Oqartussanut ikaarsaarnerup kingorna sullissiviit oqartussallu arlallit taaguutaat allanngorput. Kisiannili tamanna pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaanni allanngortinneqanngilaq, tamannalu matumani siunnersuummi iluarsineqarpoq.

2.8 Pisinnaatitaallutillu pisussaatitaasunut pineqaatissiinissamut aalajangersakkat nutarterneqarnerat

Naggataatigut siunnersuut Inatsisartut inatsisaanni pisinnaatitaallutillu pisussaatitaasunut pineqaatissiisarnermut aalajangersakkat nutarterneqarput, taamaalilluni tassani inatsisilioriaatsimi malittarisassat atuuttut naammassineqarlutik. Taamaalilluni teknikkikkut oqaasertaliinermi allanngortitsineq, suleriaatsimik allanngortitsiviunngitsoq, kisimi pineqarpoq.

3. Pisortanut aningaasaqarnikkut allaffissornikkullu sunniutaasussat

Naliliisoqarpoq siunnersuut nalinginnaasumik pisortanut akiitsunik akilinngitsuukkanik annikillisitseqataassasoq, tamannalu peqatigisaanik kommunit aamma Namminersorlutik Oqartussat akiliisinnaassuseqarnerannik pitsanngorsaassasoq. Akileraaruseriffiup akiliisitsiniarnissamut piginnaatinneqarneranik annertusititsineq aammalu ilanngaatiginnissinnaatitaanerup annertusitinneqarnera, akileraaruseriffiup akiliisitsiniarnermik suliaqarnerata ingerlaneranut atatillugu allaffissornermik oqilisaassapput. Taamaaqataanik atsiornissamut piumasaqaatip

ilaatinneqannginnera akileraaruseriffiup sulineranik sunniuteqarluarnerulersitsissaaq. Kisiannili suliniutini taakkunani aningaasaqarnikkut iluanaarutissat aalajangersimasut naatsorsorneqarsinnaanngillat. Tamatumunnga taarsiullugu iluanaarutissat pisortanut akiitsunik akilinngitsuukkanik sunniuteqarluarnerusumik akiliisitsiniartarnertut ilusilimmi atuutsinneqalissapput.

Siunnersuut akiliisitsiniarnermik suliaqarnerup tunngavissinnissaanut akileraaruseriffimmi IT atorlugu periaatsinik atuutereersunik iluarsinissamut ineriartortitsinissamullu aningaasartuuteqarnermik malitseqassasoq naliliisoqarpoq. Kisiannili tamatumunnga ineriartortitsinermut aningaasartuutissat nammineq sinaakkutissat iluanniitinneqarsinnaassasut, naliliisoqarpoq.

4. Inuussutissarsiorturnut aningaasaqarnikkut allaffissornikkullu sunniutaasussat

Siunnersuut inuussutissarsiorturnut killilimmik aningaasaqarnikkut sunniuteqassasoq naatsorsuutigineqarpoq, tassami sunniuteqarluarnerulersitsinerit aamma akiliisitsiniarnissamut piginnaatitsinerit annertusitinneqarnissaat siunnersuutigineqartut, akiitsulinnut tamaginnut akileraaruseriffiup akiliisitsiniarnermik suliaqarneranut sunniisussaammata.

Ilanngaatiginnissinnaatitaanerup annertusitinneqarnera aalajangersimasumik annertussusilimmik inuussutissarsiorturnut sunniissasoq naliliisoqarpoq, tassami taamaaliornermi ilaatigut inuussutissarsiornermut suliffeqarfinnut akiligassiisutinik akiliutissanik tunniussinerni pisortat ilanngaatiginninnissamut periarfissaat annertusisussaammata. Kisiannili naliliisoqarpoq inuussutissarsiorturnut siunnersuut pissutigalugu malunnaatilimmik allanngortitsineq malugissanngikkaat, tassami siunissami ilanngaatiginniffiullutik pisartussat, ullumikkut tamatumunnga taarsiullugu pisortanit tunniussinerni akiliussigallarnertut pisarmata.

5. Avatangiisinut, pinngortitamut inuillu peqqissusaannut sunniutaasussat

Siunnersuut avatangiisinut imaluunniit pinngortitamut sunniuteqassanngilaq. Siunnersuut aamma innuttaasut peqqissusaannut tunngatillugu sunniuteqassanngilaq.

6. Naligiissitsinermut sunniutaasussat

Siunnersuut naligiissitaanermut imaluunniit naligiissitsinermut sunniuteqassagatinneqanngilaq.

7. Innuttaasunut sunniutaasussat

Akileraaruseriffiup akiliisitsiniarnissamut piginnaatitaaneramik annertusititsinissamut aamma ilanngaatiginnissinnaatitaaneramik annertusititsinissamut siunnersuut aallaaviatigut innuttaasunut annertuunik sunniuteqartussaannngillat. Taamaattoq allaffissornikkut sulianik ingerlatitsinerit oqilisaavigineqarneranni, pisortanut taamatullu innuttaasunut kallarneqartunut akiliisitsiniarnermik suliaqarnerup ingerlasarnera oqinnerulersinneqartussaavoq.

8. Sunniutaasussat annertuut allat

Siunnersuut allanik sunniuteqassangatinneqanngilaq.

9. Oqartussanut kattuffinnullu il.il. tusarniaaneq

Siunnersuut ulloq x. qaammat aallarnerfigalugu ulloq 4. qaammat 2023 tikillugu soqutigisaqartuni makkunani tusarniaassutigineqarpoq:

Avannaata Kommunia, Kommuneqarfik Sermersooq, Kommune Qeqertalik, Qeqqata Kommunia, Kommune Kujalleq, Nunatsinni Advokatit, SIK, GE, Sulisitsisut, BDO, Grønlands Revisionskontor, Deloitte, EY, GrønlandsBanken, BankNordik, ASG, IMAK, AK, Naalakkersuisut Siulittaasuata Naalakkersuisoqarfia, Naalagaaffinngornissamut Nunanullu allanut Naalakkersuisoqarfik, Aalisarnermut Piniarnermullu Naalakkersuisoqarfik, Isumaginninnermut, Ilaqtariinnut, Suliffeqarnermut Nunamullu Namminermut Naalakkersuisoqarfik, Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfik, Peqqissutsimut Naalakkersuisoqarfik, Nunalerinnermut, Imminut Pilersornermut, Nukissiutinut Avatangiisinullu Naalakkersuisoqarfik, Ineqarnermut Attaveqaasersuutinullu Naalakkersuisoqarfik, Inuusutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoqarfik, Meeqqanut Inuusuttunullu Naalakkersuisoqarfik aamma Aningaasaqarnermut Sulisoqarnermullu Aqutsisoqarfik.

Siunnersuut tamatuma saniatigut piffissami matuma siuliani taaneqartumi tusarniaanermut nittartakkami pissarsiarineqarsinnaatinneqarpoq.

Tusarniaanermut akissuteqaatini tiguneqartuni immikkoortut pingaarnerit ilanngussat 2-mi matuma kingulianiittumi eqqartorneqarput oqaaseqarfigineqarlutillu.

Siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

Siunnersuutigineqarpoq, inatsimmi oqartussat taaguutaat Namminersorlutik Oqartussat atuutsinneqalernerisa kingorna atorneqartunik nutarterneqassasut. Tamatuma saniatigut aalajangersagaq nutarterneqarpoq, taamaalilluni inatsisilioriaatsinut malittarisassat suleriaatsillu nutaanerpaat tassani malinneqarlutik.

Nr. 2-mut

Siunnersuutigineqarpoq, aalajangersagaq atuuttoq nutarterneqassasoq, taamaalillutik ataasiakkaatigut inatsisinut innersuussinerit inatsisinut atuuttunut tunngatillugu eqqortumik takutitsillutik.

Tamatuma saniatigut siunnersuutigineqarpoq, allattorsimasunut inatsisit nutaat arlallit ilanngunneqassasut, taakkunanga arlallit kingullermik 2008-mi aalajangersakkap iluarsineqarnerata kingorna akuerineqarsimallutik. Inatsisit taakkua akileraaruseriffiup akiliisitsiniarnissamut periarfissaannik pitsanngorsaaniarluni ilanngunneqarput.

Nr. 3-mut

Siunnersuutigineqarpoq, inatsimmi oqartussanut taaguutit Namminersorlutik Oqartussat atuutsinneqalernerisa kingorna atorneqartunik nutarterneqassasut.

Tamatuma saniatigut oqaasertai iluarsineqarput, tassami paaqqinnittarfinni, eqqaavilerinermi pujoorfinnillu paaviaanermi akiligassiissutinut taaguutit allassimajunnaarmata. Akiligassiissutit taakkua inatsisit siunnersuummi nr. 2-miittut allattorsimaffiisa nutarterneqarneranni allassimammata. Siunnersuutigineqartoq, akileraaruseriffiup akiliisitsiniarnissamut, maannamut oqaasertaliinermi periarfissiissutigineqartutut, taamaaqataanik suli piginnaatitaanerata, qulakkeersinnaanissaanut naammattumik ersarissutut isigineqarpoq. Taamaalilluni taamaallaat sunniutaasumik iluarsineq, suliaqarnermi pingaaruteqanngitsutut nalilerneqartoq, tassani pineqarpoq.

Nr. 4-mut

Siunnersuutigineqarpoq, aalajangersagaq atuaruminarnerulersillugu, peqatigisaanillu § 1, imm. 2-mi allattukkanut assingunerulersillugu, § 2, imm. 1 oqaasertalerneqaaqqissasoq. Ilusilerneqarnerani siunnersuutigineqartumi aalajangersagaq akileraaruseriffimmut atoruminarnerulerpoq innuttaasunullu paasiuminarnerulerluni.

Tamatuma saniatigut siunnersuutigineqarpoq tamatumunnga taarsiullugu inatsisit peqqussutillu allattorsimanerat § 1, imm. 2-mi allattukkat attuumassuteqartortaannut innersuussinertut suliarineqassasoq, tassami aalajangersagaq taamaalilluni naannerulersinneqassammat takulertoruminarnerulersinneqassallunilu. Peqatigisaanik siunissami inatsisini innersuunneqartuni allangortitsineri, taamaallaat inatsisip oqaasertaannik ataasiinnarmi, arlalinniingitsoq, iluarsisooqartarnissaa qulakkeerneqarpoq.

Siunnersuummi inatsimmi § 1, imm. 2-mut innersuussinermi suleriaaseq atuuttoq aammalu akiligassiissutit ullumikkut akileraaruseriffimmit pinngitsaaliissummik akilersinniarneqarsinnaasut, ingerlateqqinneqarput. Akiligassiissutit Inatsisartut inatsisaannit aamma Inatsisartut peqqussutaannit allanit 27-neersut § 2-mi ilanngutsinneqarneranni, akileraaruseriffiup pinngitsaaliissummik akiliisitsiniarnissamut piginnaatitaanerisa annertusitinneqarnerinut peqatigitillugu tamanna pivoq.

Inatsisit akiligassiissutit siunnersuummi ilanngunneqanngiffii, Kalaallit Nunaanni eqqartuussisarnermik inatsimmi § 598, imm. 2-mi allassimapput. Tassani taamaalilluni allassimapput pigisami aalaakkaasumi qularnaveeqqusiilluni pisortat taarsigassarsiarititaasa utertillugit akilernerneqarnissaannik piumasaqaatit, ineqarnermut akiliummik, kiassarnermut, innaallagiamut, imermut eqqaavilerinermullu akiliinissamik pisortat piumasaqaataat kiisalu akileraarutinut akitsuutinullu piumasaqaatit. Akiligassiissutit taakkua pillugit suleriaaseq taamaalilluni allannguuteqarani ingerlaannarpoq. Tassunga tunngatillugu maluginiarneqarsinnaavoq, taarsiivigineqarnissamik piumasaqaatit assigisaalluunniit Kalaallit Nunaanni eqqartuussisarnermik inatsimmi § 598, imm. 1-imeersut, assersuutigalugu attartortitsineri atattillugu pissutsinut tunngassuteqartut, akileraaruseriffiup pinngitsaaliissummik akiliisitsiniarnissamut piginnaatitaanerata avataaniimmata.

Akiligassiissutaasartut, akileraaruseriffimmit akilersinniarneqarsinnaasut, annertusitinnissaat siunnersuutigineqartoq, akiligassiissutinik, akileraaruseriffimmi akilersinniarneqartussanngorlugit nassiunneqartunik, uppersaatunik qulakkeerinissaq pillugu isumaliutersuuteqarnissamut ammaavoq. Kisiannili piumasaqaatit akileraaruseriffimmi akilersinniarneqartussanngorlugit nassiunneqarsinnaanissaannut, akiligassiisumiit piumasaqaatip nassiunneqannginnerani isumaqatigiinngissinnaanerit paasinarsinneqareersimanissaat, tunngavissaatinneqarpoq. Taamaalilluni pisortat akiligassiissutaannik eqqortumik sunniuteqarluartumillu akiliisitsiniaanissamut, tamatumunnga tunngavigineqartut nalornissutigineqannginnissaat, ersarilluinnartumik tunngavissaatinneqarpoq, tamatumalu akiligassiissutit nassiunneqannginnerani qulakkeernissaa akiligassiisup akisussaaffigaa. Taamaakkaluartoq akiitsoqartoq akileraaruseriffiup akiliisitsiniarneranut atattillugu piumasaqaammi isumaqataasimangippat, akiitsoqartoq aamma tamatumunnga akileraaruseriffimmut akerliliissuteqarsinnaasussaavoq. Taamatut pisoqartillugu suliaasaq Kalaallit Nunaanni eqqartuussisarnermik inatsimmi § 609, imm. 1-imi maleruagassat malillugit eqqartuussivimmut suliakkiissutigineqartussaassaaq.

Akiligassiissutaasartut siunnersuummi ilanngunneqartut amerlasoorujussuuneranni, sulisunik isumalluutunik aammalu eqqartuussivimmi suliassanut eqqartuussivimmullu akitsuusinik aningaasartuutunik atuisoqartariaqarani, akileraaruseriffiup akiliisitsiniarnissamut periarfissaannik sunniteqarluarnerulersitsinissap pitsanngorsaannissallu kissaatigineqarnerani tassani pineqarpoq.

Naggataatigut siunnersuutigineqarpoq akiligassiissutaasartut allat pingasut nutaat § 2, imm. 1-imut ilanngunneqassasut. Piumasaqaat ataaseq tassaavoq aningaasarsianik annertunaarlugit tunniunneqarsimasunik utertillugit akiliinissamut piumasaqaat (nr. 3), aappaa tassaavoq qatserinermut atortunik tunisinermut akiliutinik pisortat piumasaqaataat (nr. 4) aammalu pingajuat tassaavoq ininik inuussutissarsiorfiussanik attartornermut pisortat piumasaqaataat (nr. 5). Piumasaqaatit taakkua inatsimmi tunngavissaligaanngillat, taamaattumik piumasaqaatit inatsimmi § 1, imm. 2-mi ilanngunneqarsinnaanatik.

Akiligassiissutaasartut nr. 3-mi, 4-mi aamma 5-mi siunnersuutigineqartuni allassimasut, ullumikkut eqqartuussiviit aqutugalugit akilersinniarneqarnissaat pisariaqarpoq, tamannalu nannertuunik aningaasartuuteqarfiusarpoq isumalluutinillu atuiffiusarluni. Siunnersuummi akiligassiissutaasartunut taakkununga immikkut killiligaasunut toqqaannartumik akiliisitsiniarnissamut inatsimmi tunngavissaq ilanngunneqarpoq.

Nr. 3 pillugu erseqqinnerusumik – aningaasarsianik annertunaarlugit tunniussineq (condictio indebiti)

Oqaasertaliinissamut siunnersuutigineqartoq matumani paasineqassaaq, piumasaqaatit kukkunikkut pisortani sulisitsisup sulisumut aningaasarsianut annertunaarlugit tunniussinerani pilersimasut, tamatumalu kingorna akileraaruseriffik aqutugalugu piumasaqaatip akilersinniarneqarnissaa. § 2-mut ilanngussinermi, tamatuma kingorna eqqartuussiviit akuliutsinnagit piumasaqaatit akileraaruseriffimmi pinngitsaaliissummik akiliisitsiniarnissamut piareersimassapput.

Oqaatigineqassaaq, aningaasarsianik annertunaarlugit tunniunneqarsimasunik utertillugit akiliinissaq pillugu piumasaqaammut atatillugu akiligassiisup aamma akiitsoqartup akornanni isumaqatigiinngittoqarsimasinnaasoq. Akiligassiisutit akileraaruseriffimmi akilersinniarneqartussanngorlugit nassiuunneqartut uppernarsaataannik qulakkeerisarneq pillugu immikkoortoq matuma siulianiittoq innersuussutigineqarpoq.

Nr. 4 pillugu erseqqinnerusumik – qatserinermut atortut

Oqaasertaliinissamut siunnersuutigineqartoq matumani paasineqassaaq, piumasaqaatit kommunit imaluunniit Naalakkersuisut qatserinermi atortunik tunisinerranni pilersartut, ilanngullugit qapummik qatserutit, uliit qatserutit, slangenut ikkuffissat assigisaallu.

Nr. 5 pillugu erseqqinnerusumik – init illut initaannit allaanerusut (init inuussutissarsiornermut atorreqartut il.il.)

Tamatuma saniatigut Naalakkersuisut imaluunniit kommunit ininik allanik, ataatsimiittarfinnik illuutinilluunniit inissianut siunertanit allaanerusumik attartornerannut akiliutitut piomasagaataat pineqartunut ilanngutsinneqarput. Tamanna paasineqassaaq attartornermut tunngasuni attartornermut akiliummut piomasagaat, pisortat illumi inimik attartornermut akiliummut piomasagaataannik pinngitsaaliissummik akiliisitsiniartarnek pillugu Kalaallit Nunaanni eqqartuussisarnermik inatsimmi § 698, imm. 2, nr. 2-mi oqaasertaliinerup saniatigut inissisimasoq. Taamaaliornermi akileraaruseriffiup pinngitsaaliissummik akiliisitsiniarnissamat piginnaatitaaneri, inuussutissarsiornermut attartornerit assigiinngitsut pineqartunut ilaatilerlugit, annertusitinneqarput, tassani taakkua taamaangippat oqaatsip ”illumi ini” avataaniilissammata, taanna inissianut siunertanut initut paasineqartarmat.

Nr. 5-imut

Siunnersuutigineqarpoq, § 3, imm. 6, atorunnaarsinneqassasoq, tassani inatsimmi § 3 a-mi aalajangersagaq taamaqataa nutaanerusorlu atuutereermat. Tassani teknikkikkut sunniutaasumik iluarsineq pineqarpoq.

Nr. 6-imut

Siunnersuutigineqarpoq, ilanngaatiginnissinnaatitaaneq annertusitinneqassasoq. Tamanna aamma tunniussinerit suut ilanngaatiginniffigineqarsinnaanerannut aammalu akiligassiissutit suut ilanngaatiginninnermi matussuserneqarsinnaanerannut tunngatillugu atuuppoq.

Akiligassiinernik tunniussinerni ilanngaatiginnissinnaalerneq

Siunnersuutigineqarpoq, ilanngaatiginnissinnaalerneq aammattaaq akiligassanik, assersuutigalugu akiligassiissutini assigisaannilu, akiliinissamat atatillugu pisortat tunniussineranni pisinnaassasoq. Taamaaliornermi paasineqassaaq pisortat akiligassamik, pilersuisumit nioqqutissamik imaluunniit kiffartuussinermik pisinermi tigusaanik, akiliinerat. Nioqqutissamik imaluunniit kiffartuussinermik pilersuineq isumaqatigiissut assigisaaluunniit naapertorlugu pisimasussaavoq.

Pisartut nalinginnaasuunerpaat tassaassapput, isumaqatigiissut nioqqutissanik imaluunniit sullissinernik pilersuisumut, peqatigisaanik pisortanut akilinngitsuukkanik akiitsoqartumut, isumaqatigiissutigisimasaat tunngavigalugu pisortat akiliinissaaq. Tamanna assersuutigalugu tassaasinnaassaaq sanasut suliffeqarfiat, suliaqarnerminut Namminersorlutik Oqartussat sullillugit suliarisimasaminnut akiligassiissummik nassiussisimasoq, aammalu suliffeqarfik peqatigisaanik kommunimut eqqaavilerinermut akiligassiissummumut akilinngitsuukkanik akiitsoqarluni. Pisumi taamaattumi siunnersuutigineqarpoq kommuni akiligassiissummumut tigusisussatut Namminersorlutik Oqartussat akiligassiissutip aningaasartaannik tunniussinissaq ingerlattussanngorpassuk, ilanngaatiginnissinnaassasoq. Tunniussinermi taamaalilluni aningaasat sanasup suliffeqarfiata kommunimut akiitsuinut naapertuuttut ilanngaatigineqassapput. Taamaaliornermi

Namminersorlutik Oqartussat tunniussinerisa ilaat suliffeqarfiup kommunimut akiitsuinik akilinngitsuukkanik annikillisitsinissamut imaluunniit naligiissaanissamut atorneqassaaq. Tamatuma kingorna aningaasartai sinneqarpata, suliffeqarfimmut taakkua tunniunneqassapput.

Aalajangersakkami siunnersuutigineqartumi, ullumikkut akiliisitsiniartartup ingerlatsinerani taarsiititsilluni akiliisitsisoqarluni pisartut ilai ilaaterlugit, ilanngaatiginnissinnaatitaaneq annertusitinneqarpoq. Kisiannili akiliisitsiniartartup ingerlatsisarneri taakkua, taagorneqartut taarsiititsilluni akiliisitsinernik ingerlatsinerit, akileraaruseriffimmi annertuunik isumalluutunik atuiffiusariaqartarput. Taamaalilluni tamatumunnga inatsisit malillugit pisussat amerlasuujusarput. Taarsiititsilluni akiliisitsinernik ingerlatsinerit kingunerisarpaat, akileraaruseriffiup pisortat akiligassiinernik tunniussinissaanni taarsiititsilluni akiliisitsinnaalernera, tassami tamatumunnga piumasaqaatit naammassineqarsimalissammata. Ilangaatiginnissinnaatitaanerup annertusitinnissaani siunnersuutigineqartumi taamaalilluni akiitsoqartup inatsisitigut isumannaatsuunissaa piliutigineqassanngilaq. Kisiannili akileraaruseriffiup akiliisitsiniarnermik suliaqarnera sunniuteqarluarnerulersinneqassaaq, tassami taarsiititsilluni akiliisitsinernik ingerlatsinerimut atasumik suliat ingerlasarneri isumalluutunik atuiffiusartut, suliat ingerlanerinit ingerlaannartunngortinneqartunit taarserneqarsinnaalissammata.

Akiligassiissutaasartunik, ilanngaatiginnissinnaalernermi matussuserneqarsinnaasunik, annertusititsineq

Siunnersuutigineqarpoq, akiligassiissutit ilanngaatiginnissinnaalernermi matussuserneqarsinnaasut allattorsimaffiannut atuuttumut akiligassiissutaasartut arlallit ilanngunneqassasut, taamaalilluni akiligassiisarnermi ilanngaatiginnissinnaatitaaneq § 2-mi siunnersuutigineqartumi allassimasut annertoqqatingajaanik annertussuseqalissalluni. Taamaalilluni siunnersuutigineqarpoq, inatsimmi § 1, imm. 2-mut innersuussineq ilanngunneqassasoq. Allattuiffiup tamakkerlugu ilanngunnissaa naleqquttoq naliliisoqarpoq, tassami tamanna akileraaruseriffiup akiliisitsiniarnermik suliaqarneranut pitsaanerpaanik sinaakkusiisussaammat, taamatullu innuttaasut inatsisitigut isumannaatsuunerat pilliutigineqartussaani.

Akiligassiissutaasartut, akileraaruseriffiup ilanngaatiginnissinnaalernerani matussuserneqarsinnaasut annertusitinnissaanni siunnersuutigineqartumi, akiligassiissutip suminggaaneerana eqqarsaatiginagu sakkussatut annertunerusumik atorneqarsinnaalissaaq. Taamaaliornermi suliap ingerlasarnera ingerlaavartunngortinneqarsinnaanerulertussaalluni, tassami isumalluutunik atuiffiusumik atortoqarani toqqartuisoqartarunnaassammat.

Tamatuma saniatigut naliliisoqarpoq siunnersuut innuttaasut inatsisitigut isumannaatsuunissaannut atatillugu ajornartorsiutitaqassanngitsoq, tassami siunnersuutigineqartumi, akiligassiissutinik tunniussinermi ilanngaatiginnissinnaanerimut atatillugu matuma siuliani taaneqartutut, taamaaqataanik nalilersuinissaaq pisussaammat. Maannakkut isumalluutunik atuiffiusumik

taarsiititsilluni akiliisitsineranut suleriaaseqarneq, annertunerpaatigut ilanngaatiginnissinnaalernermik taarserneqartussaassaaq.

Akiligassiissutitut tunngatillugu aammattaaq siunnersuutigineqarpoq, aningaasarsianik annertunaarlugit tunniunneqarsimasunik utertillugit akiliinissamat pisortat piumasaqaataannut matussutissatut ilanngaatiginnittoqarsinnaassasoq. Tamatuma saniatigut siunnersuutigineqarpoq, ininik inuussutissarsiorfiusussanik attartornermut aamma qatserineranut atortunik tunisinermut akiliutissanut piumasaqaatinik matussusiinissamat ilanngaatiginnittoqarsinnaassasoq. Siunnersuummut nr. 2-mut nassuiaatit innersuussutigineqarput, tassani tamanna erseqqinnerusumik nassuiarneqarmat.

Nr. 7-imut

Siunnersuutigineqarpoq § 6 atorunnaarsinneqassasoq, tassami akiligassiissutitut taaneqartunut akiliisussaaneq, tamatumunnga inatsimmi ataaniittumi atuutereermat.

Nr. 8-mut

Siunnersuutigineqarpoq, neqeroortitsineranut innersuussut peerneqassasoq, tassami neqeroortitsisarnermut inatsimmi tamanna pillugu immikkut maleruagassaq assingusoq atuummat. Tamatuma saniatigut siunnersuutigineqarpoq inatsimmi oqartussanut taaguutit, Namminersorlutik Oqartussat atuutilernerisa kingorna atorneqartunik, nutarterneqassasut.

Nr. 9-mut aamma 10-mut

Siunnersuutigineqarpoq, inatsimmi oqartussanut taaguutit, Namminersorlutik Oqartussat atuutilernerisa kingorna atorneqartunik, nutarterneqassasut.

Nr. 11-mut

Siunnersuutigineqarpoq, akiligassiissutitut akiliisitsiniarnissamat tunniunneqartunut piumasaqaatit pillugit aalajangersakkamat atuuttumut 100 koruuninik annikinnerpaaffissanut killissaq ilanngunneqassasoq.

Annikinnerpaaffissanut killissaq 2021-mut Aningaasanut inatsimmiilli, aningaasanut inatsimmi "Suliassaqarfimmut 20-24-mut Aningaasaqarnermut Naligiissitaanermullu" oqaasertaliussaq nr. 3 atuussimavoq. Taamaalilluni maleruagassaq atuuttoq, ullumikkut ukiumoortumik aningaasanut inatsimmi allassimasoq, inatsimmut aalajangersimasumut nuutinneqartoq tassani pineqarpoq.

Nr. 12-imut

Siunnersuummi nr. 12 paragraffinik nutaanik marlunnik imaqarpoq, tassami pisortat ingerlatsineranni atsiornissamat piumasaqaatip ilaatinneqannginnera (§ 11 h) pillugu nalunaarummik atuutilersitsinissamat piginnaatitsinerit marluk ilanngunneqarmata, taamatullu siunnersuummi nr. 11-mut nangissutigalugu akiligassiissutit 100 koruuninik

annikinnerusunilluunniit annertussuseqartut taamaatinneqartarnissaat pillugu aalajangersagaq siunnersuutigineqarluni (§ 11 i).

§ 11 h

Aalajangersakkami nutaami siunnersuutigineqarpoq, allakkianik atsiorneqanngitsunik imaluunniit atsiornermik maskiinamik issuarneqartumik atsiorneqartumik akiliisitsiniartartut atuutsitsilernissaat pillugu maleruagassanik aalajangersaanissamik Naalakkersuisut periarfissinneqassasut. Pisortanut akiitsunik akilinngitsuukkanik akiliisitsiniartarneq pillugu Namminersorlutik Oqartussat nalunaarutaata iluarsanneqarnerani pisussami aalajangersakkap atorneqarnissaa eqqarsaatigineqarpoq.

Aalajangersakkap oqaasertalerneqarnerani siunertaavoq, allakkia pineqartut taakkua nalunaarutitut ilusilimmi allassimassasut, taamaalilluni allakkia aalajangersarneqartut tassani pineqarnerat qulakkeerneqassalluni.

§ 11 i

Siunnersuutigineqarpoq, akiligassiissutit ataasiakkaat 100 koruuninik annikinnerusumilluunniit aningasartai sinneqalerpata, akileraaruseriffiup akiligassiissutit pisassalinnut utertissinnaassagai pillugit aalajangersagaq atuutsinneqalissasooq. Inatsisip oqaasertaanni akiligassiisumut utertitsineq atorneqarpoq, tassami akileraaruseriffik isumakkeerinissamut imaluunniit allatut aningaasat kommunitut allanullu utertinneqartut qanoq pineqassanersut isummerfiginissaanut piginnaatitaanngimmat.

100 koruuninut killiliineq, akiligassiissutinik 100 koruuninik akiliisitsiniarnissamut nuussisarnermut annikinnerpaaffissatut killiliussa pillugu siunnersuummi nr. 11-mut ataqatigiissillugu isineqassaaq. Siunnersuut pingaarnertigut 2021-mut Aningaasanut inatsimmili, aningaasanut inatsimmi ”Suliassa qarfirmut 20-24-mut Aningaasaqarnermut Naligiissitaanermullu” oqaasertaliussami nr. 2-mi inatsimmi aalajangersaaneruvoq. Taamaalilluni maleruagassaq atuuttoq, ukiumoortumik aningaasanut inatsimmi allassimasooq, inatsimmut aalajangersimasumut nuutinneqartoq, taamaallaat tassani pineqarpoq.

Tamatuma saniatigut siunnersuutigineqarpoq, akiligassiissutit ataasiakkaat aningaasartai pingaarnertit imaluunniit aningaasartai sinneruttut 100 koruuninik annikinnerusumilluunniit annertussuseqarpata, kommunit aamma Naalakkersuisut nammineerlutik akiligassiissutiminnik isumakkeerinissamut piginnaatinneqassasut.

Nr. 14-imut

Siunnersuutigineqarpoq, inatsimmi oqartussanut taaguutit, Namminersorlutik Oqartussat atuutilernerisa kingorna atorneqartunik, nutarterneqassasut.

Tamatuma saniatigut siunnersuutigineqarpoq pisinnaatitaasunut pisussaatitaasunullu pineqaatissiisarnermut aalajangersakkap oqaasertalerneqarnera nutarterneqassasoq, taamaalilluni taanna inatsisilioriaatsinut malittarisassanut atuuttunut naapertuutilerluni. Taamaalilluni teknikkikkut allanngortitsineq taamaallaat tassani pineqarpoq, tassami suleriaaseq allanngortinnagu ingerlatiinnarneqarmat.

§ 2-mut

Siunnersuutigineqarpoq, inatsit ulloq 1. januar 2025 atuutilissasoq aammalu akiligassiissutinut, taakkua piffissaq taanna sioqqullugu imaluunniit kingorna pilersimanagerat apeqqutaatinnagu, atuutissasoq.

Ilanngussaq 1

Siunnersuut inatsimmut atuuttumut sanilliullugu	
<i>Oqaasertalerneqarnera atuuttoq</i>	<i>Siunnersuut</i>
	§ 1 Aningaasarsianit akileraarutit pillugit Inatsisaanni nr. 12, 2. november 2006-imeersumi, ilaatigut Inatsisartut inatsisaanni nr. 2, 26. april 2007-imeersumi, Inatsisartut inatsisaanni nr. 11, 15. november 2007-imeersumi, Inatsisartut inatsisaanni nr. 9, 5. december 2008-meersumi, Inatsisartut inatsisaanni nr. 3, 30. november 2009-meersumi, Inatsisartut inatsisaanni nr. 9, 3. december 2012-imeersumi, Inatsisartut inatsisaanni nr. 10, 29. november 2013-imeersumi, Inatsisartut inatsisaanni nr. 7, 6. juni 2016-imeersumi, Inatsisartut inatsisaanni nr. 22, 28. november 2018-imeersumi, Inatsisartut inatsisaanni nr. 41, 2. december 2019-imeersumi, aammalu kingullermik Inatsisartut inatsisaanni nr. 11, 1. december 2021-meersumi allanngortinneqartumi, makkua allanngortinneqarput:
§ 1, imm. 1: § 1. Inatsisartut inatsisaanni matumani Kalaallit Nunaanni Namminersornerullutik Oqartussat Kalaallillu Nunaanni kommunit akiligassiissutaannik akiliisitsiniartarneq pineqarpoq.	1. § 1, imm. 1, imatut oqaasertalerneqarpoq: § 1. Inatsisartut inatsisaat manna kommunit aamma Namminersorlutik Oqartussat akiligassiissutaannik akiliisitsiniartarnermut tunngassuteqarpoq.
§ 1, imm. 2: <i>Imm. 2.</i> Inatsisartut inatsisaat pisassarisanut Inatsisartut inatsisaat peqqussutaallu makkua tunngavigalugit pilersimasunut atuuppoq: 1) Aningaasarsianit akileraarutit pillugit Inatsisartut inatsisaat, 2) Akileraaruserinermik ingerlatsineq pillugu Inatsisartut inatsisaat, 3) Pappiaqqanik nalilinnik naqissusiinermi akitsuut pillugu Inatsisartut inatsisaat,	2. § 1, imm. 2, imatut oqaasertalerneqarpoq: <i>Imm. 2.</i> Inatsisartut inatsisaat Inatsisartut inatsisai Inatsisartullu peqqussutai makkua naapertorlugit akiligassiissutaalersimasunut atuuppoq: 1) Aningaasarsianit akileraarutit pillugit Inatsisartut inatsisaat. 2) Akileraaruserinermik ingerlatsineq pillugu Inatsisartut inatsisaat. 3) Pappiaqqanik nalilinnik naqissusiinermi akitsuut pillugu Inatsisartut inatsisaat.

<p>4) Eqquniaasitsinermi akileraarutit pillugit Inatsisartut inatsisaat,</p> <p>5) Aningaasanik ikisilluni pinnguaatinut akileraarut pillugu Inatsisartut inatsisaat,</p> <p>6) Umiarsualivimmiinnermut aamma umiarsuit takornarianik angallassissutit ilaasunik angallassinerrannut akileraarutit pillugit Inatsisartut inatsisaat,</p> <p>7) Qamutit motorillit akileraarutaat pillugit Inatsisartut inatsisaat,</p> <p>8) Raajanut akitsuutit pillugit Inatsisartut inatsisaat,</p> <p>9) Inuussutissarsiutitigut ilinniagaqarnermut sulisitsisut akiliutaat pillugit Inatsisartut inatsisaat,</p> <p>10) Sulisoqarnermut akitsuut pillugu Inatsisartut inatsisaat,</p> <p>11) Imigassat ethanolimik akullit Kalaallit Nunaanni sananeqarsimasut akitsuutaat pillugit Inatsisartut inatsisaat,</p> <p>12) Meeqqanut ileqqaakkat pillugit Inatsisartut inatsisaat,</p> <p>13) Ilinniagaqarnermut pillugit Inatsisartut peqqussutaat,</p> <p>14) Inuussutissarsiutinut ilinniartitaanerit inuussutissarsiutinullu pikkorissartitsisarnerit pillugit Inatsisartut peqqussutaat,</p> <p>15) Meeqqanut akilersuutit il.il kiisalu meeravissartaarnermi tapiissutit tunniunneqartarneri pillugit Inatsisartut peqqussutaat,</p> <p>16) Pisortanit ikiorsiissutit pillugit Inatsisartut peqqussutaat,</p> <p>17) Inissianik attartortitsisarneq pillugu Inatsisartut peqqussutaat,</p> <p>18) Inissialiornermut tapersiissuteqartarneq pillugu Inatsisartut peqqussutaat,</p> <p>19) Aalisarnermut, piniarnermut nunalerinermullu tapersiisarneq pillugu Inatsisartut peqqussutaat</p>	<p>4) Eqquniaasitsinermi akileraarutit pillugit Inatsisartut inatsisaat.</p> <p>5) Aningaasanik ikisilluni pinnguaatinut akileraarut pillugu Inatsisartut inatsisaat.</p> <p>6) Umiarsualivimmiinnermut akileraarutit pillugit Inatsisartut inatsisaat.</p> <p>7) Qamutit motorillit akileraarutaat pillugit Inatsisartut inatsisaat.</p> <p>8) Kalaallit Nunaanni aalisarnermi pisarineqartut isumalluutinik atuinermut akitsuutaat pillugit Inatsisartut inatsisaat.</p> <p>9) Pigisanit pissarsiat ilaasa akileraaruserneqartarnerat pillugu Inatsisartut Inatsisaat.</p> <p>10) Sulisoqarnermut akitsuut pillugu Inatsisartut inatsisaat.</p> <p>11) Imigassat ethanolimik akullit Kalaallit Nunaanni sananeqarsimasut akitsuutaat pillugit Inatsisartut inatsisaat.</p> <p>12) Kulturikkut ingerlatsineq sunngiffimmilu sammisassaqaqtitsineq pillugit Inatsisartut inatsisaat.</p> <p>13) Ilinniagaqarnermut pillugit Inatsisartut inatsisaat.</p> <p>14) Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaat.</p> <p>15) Meeqqanut akilersuutit il.il. kiisalu meeravissartaarnermi tapiissutit tunniunneqartarneri pillugit Inatsisartut peqqussutaat.</p> <p>16) Pisortanit ikiorsiissutit pillugit Inatsisartut Inatsisaat.</p> <p>17) Tapersiissutitalimmik inissialiortiternermut taarsigassarsititsisarneq pillugu Inatsisartut inatsisaat.</p> <p>18) Inissianik attartortitsisarneq pillugu Inatsisartut peqqussutaat.</p> <p>19) Nukissiornermi ikummatissat avatangiisinut akitsuutaat pillugu Inatsisartut inatsisaat.</p> <p>20) Aalisarnermik piniarnermillu inuussutissarsiutillit inuussutissarsiornerrannik siuarsaneq pillugu Inatsisartut inatsisissaattut.</p> <p>21) Nunalerinermik inuussutissarsiornerrup siuarsarneqarnissaa pillugu Inatsisartut inatsisaat.</p>
--	--

<p>20) Aalisarnermik, piniarnermillu inuussutissarsiutillit inuussutissarsiorterannik siuarsaaneq pillugu Inatsisartut peqqussutaat,</p> <p>21) Nunalerinermut tapersiisarneq pillugu Inatsisartut peqqussutaat,</p> <p>21) Aalisarnermut aningaasaliissutinut immikkoortitat pillugit Inatsisartut inatsisaat,</p> <p>22) Kommunit inuussutissarsiutini il.il. aningaasaliinermikkut inuussutissarsiutininik ineriartortitseqataanissaminnut periarfissaat pillugit Inatsisartut inatsisissaa,</p> <p>23) Takornarianut, Nunamilu suliffeqarfiit siuarsarneqarnissaannut Inatsisartut inatsisaat,</p> <p>24) Biblioteqarnermi Inatsisartut peqqussutaat aamma</p> <p>25) Unamillernermi Inatsisartut inatsisaa.</p>	<p>22) Kommunit inuussutissarsiutini il.il. aningaasaliinermikkut inuussutissarsiutininik ineriartortitseqataanissaminnut periarfissaat pillugit Inatsisartut inatsisissaa.</p> <p>23) Nunami inuussutissarsiutinut tunngatillugu inuussutissarsiorterannik siuarsaaneq pillugu Inatsisartut inatsisaat.</p> <p>24) Atuagaateqarfiit pillugit Inatsisartut inatsisaat.</p> <p>25) Unammilleqatigiinneq pillugu Inatsisartut inatsisaat.</p> <p>26) Peqqinnissaqarfiup sullissineri il.il. pillugit Inatsisartut peqqussutaat.</p> <p>27) Sermip erngullu niuernikkut iluaqutigineqarnissaat pillugu Inatsisartut inatsisaat.</p> <p>28) Soraarnerussutisiaqalernissamut aningaasaatit ilaannit pissarsiat akileraaruserneqartarnerat pillugu Inatsisartut inatsisaat.</p> <p>29) Aatsitassat pillugit ingerlatallu tamatumunnga pingaarutillit pillugit inatsisartut inatsisaat.</p> <p>30) Aatsitassanut tunngasunik suliaqarneq pillugu Inatsisartut inatsisaat.</p> <p>31) Naartunermi, erninermi meeravissartaarnermilu sulinngiffeqartarneq pillugu Inatsisartut inatsisaat.</p> <p>32) Utoqqalinersiaqarneq pillugu Inatsisartut inatsisaat.</p> <p>33) Siusinaartumik pensionisiat pillugit Inatsisartut inatsisaat.</p> <p>34) Meeqqanut tapiissutit pillugit Inatsisartut inatsisaat.</p> <p>35) Suliffissarsiortunut ikiorsiissutit pillugit Inatsisartut Inatsisaat.</p> <p>36) Pilersaaruserneq aamma nunaminertat atornerqartarnerat pillugit Inatsisartut inatsisissaa.</p> <p>37) Avatangiisit innarlitsaaliorneqarnissaanik Inatsisartut inatsisaat.</p>
--	--

	<p>38) Imaani avatangiisit illersorneqarnissaat pillugu Inatsisartut inatsisaat.</p> <p>39) Inuit innarluutillit tapersersorneqarnissaannut Inatsisartut inatsisaat.</p> <p>40) Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaaliuinermi iliuusissat pillugit Inatsisartut inatsisaat.</p> <p>41) Sanaartorfissagissaaneq, pisortat kuuffeqarfinnut aqqusersuutaat aamma pisortat aqqusiniutaat pillugit Inatsisartut inatsisaat.</p> <p>42) Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisissaattut siunnersuut.</p> <p>43) Aalisarnermut aningaasaliissutitut immikkoortitat pillugit Inatsisartut inatsisaat.</p> <p>44) Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaat.</p> <p>45) Inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut aallarteqqinnissamut tapiiffigineqartarnerat pillugu inatsisartut inatsisaat.</p>
<p>§ 1, imm. 3:</p> <p><i>Imm. 3.</i> Aammattaaq Kalaallit Nunaanni Namminersornerullutik Oqartussat kommunillu akiligassiisutaat, paaqqinnittarfinni angerlarsimaffimmilu ulluunerani meeqqanik paaqqinnittarnernut, kiassarnermut, innaallagissamut, imermut, eqqaanermut, pujoorfinnik paaviaanermullu innuttaasut suliffeqarfiillu akiligassaasa akilersinniarneqartarnerini Inatsisartut inatsisaat manna atuuppoq.</p>	<p>3. § 1, imm. 3, imatut oqaasertalerneqarpoq:</p> <p><i>Imm. 3.</i> Aammattaaq Inatsisartut inatsisaat kommunit aammat Namminersorlutik Oqartussat innuttaasut suliffeqarfiillu kiassarnermut, innaallagiamut imermullu akiliinissamut pisussaaffinni akiligassiisutaannik akiliisitsiniarnermi atuuppoq.</p>

<p>§ 2, imm. 1:</p> <p>§ 2. Pisassarisat § 3, imm. 4 aamma 5-imi taaneqartut pisassarisallu meeqqanut ileqqaakkat pillugit inatsit naapertorlugu, ilinniagaqarnersiutit pillugit Inatsisartut peqqussutaat, inuussutissarsiutinut ilinniartitaanerit inuussutissarsiutinullu pikkorissartitsisarnerit pillugit Inatsisartut peqqussutaat, pisortanit ikiorsiissutit pillugit Inatsisartut peqqussutaat, bibliotekeqarneq pillugu Inatsisartut peqqussutaat naapertorlugit kiisalu Namminersornerullutik Oqartussat kommunillu ulluunerani meeqqerivinnut pujoorfinnillu paaviaanernut akiliutinik pisassarisaat, Kalaallit Nunaanni eqqartuussisarnermik inatsimmi eqqartuussutinik il.il. naammassiniartarnermut malittarisassat malillugit pinngitsaaliinikkut akilersinneqarsinnaapput.</p>	<p>4. § 2, imm. 1, imatut oqaasertalerneqarpoq:</p> <p>§ 2. Akiligassiissutit makkua Kalaallit Nunaanni eqqartuussisarnermik inatsimmi akiligassiissutinik pinngitsaaliissummik naammassinnitsitsisarneq pillugu kapitali 46-mi aamma 47-mi maleruagassat malillugit pinngitsaaliissummik naammassitinneqarsinnaapput:</p> <ol style="list-style-type: none"> 1) Akiligassiissutit § 3, imm. 4-mi aamma 5-imi taaneqartut. 2) Inatsisartut inatsisai aamma Inatsisartut peqqussutai § 1, imm. 2, nr. 12-17-imi, aamma nr. 20-45-mi taaneqartut naapertorlugit akiligassiissutit. 3) Kommunit aamma Namminersorlutik Oqartussat aningaasarsianik annertunaarlugit tunniunneqarsimasunik utertillugit akilerneqarnissaannik piumasagaataat. 4) Kommunit aamma Namminersorlutik Oqartussat qatserinermut atortussanik tunisinnermut akiliinissamut piumasagaataat. 5) Kommunit aamma Namminersorlutik Oqartussat ininik, ataatsimiittarfinnik imaluunniit illuutinik, illup initarinngisaannik, attartornermut akiliinissamut piumasagaataat.
<p>§ 3, imm. 6:</p> <p>Imm. 6. Aningaasat imm. 1 naapertorlugu ilanngartuutaasimasut qaammatip ilanngaassuiffigineqarsimasup ulluisa kingullianni akiligassanngussapput, kingusinnerpaamillu akilerneqartussaallutik qaammatip tulliani ulluinnarmi kingullermi.</p>	<p>5. § 3, imm. 6 atorunnaarsinneqarpoq.</p>
<p>§ 5, imm. 1:</p> <p>§ 5. Akileraarutinut akiliutaavallaarsimasut utertinneqalerneranni kommunit, pissarsisussap utertitassanngorlugit ikiorsiissutinut, pilersuisussaataitanermit akilersuutinut</p>	<p>6. § 5, imm. 1, imatut oqaasertalerneqarpoq:</p> <p>§ 5. Akileraarutinik annertunaarlugit akilerneqarsimasunik utertillugit akiliinermi aammalu kommunip imaluunniit Namminersorlutik Oqartussat inunnt</p>

<p>siumoortumik tunniunneqartartunut, inuussutissarsiutitigut suliffeqarfinnut aningaasatigut attartortissimasa-nut, kommunit inuussutissarsiutitigut suliffeqarfinnut il.il. aningaasaliinermikkut inuussutis-sarsiutinik ineriartortitseqataasinnaanerannut atatillugu pisassarisanut, kiisalu paaqqinnittar-finni angerlarsimaffinnilu ulluunerani paaqqinnittarnermut, eqqaanermut pujoorfinnillu paavi-aanermut pisassarisanut akilerneqartussanngoreersimagaluartunut akiligassarisaanut naaper-tuuttunik ilanngartuisinnaatitaapput.</p>	<p>imaluunniit pisinnaatitaallutillu pisussaataasunut nioqqutissanut sullissinernullu akiliuteqarneranni, kommunit aamma Namminersorlutik Oqartussat pisinnaatitaasup akiligassiissutit makkua pillugit akiitsuisa akiligassanngoreersut akilerneqanngitsut aningaasartaattut annertussusilinnik ilanngaassisinnaapput:</p> <ol style="list-style-type: none"> 1) Akiligassiissutit Inatsisartut inatsisai aamma Inatsisartut peqqussutai § 1, imm. 2-mi taaneqartut naapertorlugit pilersimasut. 2) Aningaasarsiat annertunaarlugit tunniunneqartut utertillugit akilerneqarnissaannut akiligassiissutit. 3) Qatserinermut atortussanik tunisinermut akiliutissanut akiligassiissutit. 4) Ininik illup initaannit allaanerusunik attartornermut akiliutissanut akiligassiissutit.
<p>§ 6, imm. 1: § 6. Aappariit inuillu nalunaarsorneqarsimasumik aappariittut inooqatigiit, inissianik attartorneq pillugu Inatsisartut peqqussutaat tunngavigalugu akiligassanut kiisalu eqqaanermut pujoorfinnillu paaviaanermut atatillugu Namminersornerullutik Oqartussat kommunillu akiligassiissutaannut assigiimmik akisussaaqatigiipput. <i>Imm. 2.</i> Imm. 1 naapertorlugu assigiimmik akisussaaqatigiinneq, aappariinnerup imaluunniit aappariittut nalunaarsorneqarsimasutut inooqatigiinnerup nalaani akiligassiissutaasimasunut taamaallaat atuuppoq. <i>Imm. 3.</i> Aappariit meeqqamut meeqqanulluunniit pilersuisussaatitaanermik aalajangersaavigineqarsimanngippata imm. 1-mi aalajangersagaq aammattaaq Namminersornerullutik Oqartussat kommunilu</p>	<p>7. § 6 atorunnaarsinneqarpoq.</p>

<p>paaqqinnittarfiini, angerlarsimaffinnilu ulluunerani paaqqinnittarnermut akiligassiissutaannut atuutsinneqarpoq.</p>	
<p>§ 7: § 7. Sanaartugassanut suliassanullu allanut suliffeqarfiit sulisussarsiarineqarnerini imaluunniit nioqqutissanik kiffartuussissutissanilluunniit inniminniisoqartillugu Naalakkersuisut kommunalbestyrelsilluunniit aalajangersinnaavaat aalajangiinermit suliffeqarfiit akilerneqanngitsunik akileraarutitut akitsuutinullu akiligassaqartoqarnera isigineqassasoq. <i>Imm. 2.</i> Imm. 1-imi aalajangersakkat pillugit Naalakkersuisut malittarisassanik erseqqinnerusunik aalajangersaasinnaapput.</p>	<p>8. § 7 imatut oqaasertalerneqarpoq: § 7. Suliffeqarfiit illuliornernik sanaartornernillu suliassanik sularinninnissamut sulisussarsiarineqarneranni, suliffeqarfiit akileraarutitut akitsuutinullu pillugit akilerneqanngitsunik, akiligassanngoreersunik akiitsoqarnerisut eqqarsaatigineqassanersoq, kommunalbestyrelsi aamma Namminersorlutik Oqartussat aalajangiisinnaapput. <i>Imm. 2.</i> Aalajangiinerit imm. 1-imi taaneqartut pillugit maleruagassanik Naalakkersuisut aalajangersaasinnaapput.</p>
<p>§ 10: § 10. § 1, imm. 2-mi aamma 3-mi Inatsisartut inatsisaat peqqussutaallu taaneqartut tunngavigalugit akiligassiissutinik akiliisitsiniartartut akiliisitsiniarneritut atatillugu akiliuteqartitsisarneq pillugu malittarisassanik Naalakkersuisut aalajangersaasinnaapput.</p>	<p>9. § 10 imatut oqaasertalerneqarpoq: § 10. Inatsisartut inatsisai aamma Inatsisartut peqqussutai § 1, imm. 2-mi aamma 3-mi taaneqartut malillugit akiligassiissutinik akiliisitsiniartartut akiliisitsiniarnerannut atatillugu akiligassiisarneq akilersuisarnerlu pillugit aalajangersakkanik Naalakkersuisut aalajangersaasinnaapput.</p>
<p>§ 11: § 11. § 1-mi Inatsisartut inatsisaat peqqussutaallu taaneqartut tunngavigalugit akiligassiissutinik akiliisitsiniartarnermi periusaasut pillugit malittarisassanik Naalakkersuisut aalajangersaasinnaapput.</p>	<p>10. § 11 imatut oqaasertalerneqarpoq: § 11. Inatsisartut inatsisai aamma Inatsisartut peqqussutai § 1-imi taaneqartut malillugit akiliisitsiniarnermi periaasissaq pillugu maleruagassanik Naalakkersuisut aalajangersaasinnaapput.</p>
<p>§ 11 a, imm. 3: <i>Imm. 3.</i> Akiligassiissutit akileraaruserivimmut tunniunneqassapput akiliisitsiniarnissaq anguniarlugu, tassani akiliinissamut piffissaliussaqaangerneqareersimappat, aammalu akiliisitsiniarnerit kinguneqarsimangippata.</p>	<p>11. § 11 a, imm. 3 imatut oqaasertalerneqarpoq: <i>Imm. 3.</i> Akiligassiissutit 100 koruuninik imaluunniit annertunerusunik annertussusillit, akiliinissamut piffissamut killigitap qaangiutereernerani, aammalu nalinginnaasumik nukingisaarutitut suleriaatsit</p>

<p>Kommuninili pisassarisat akileraaruserivimmut akilersinniagassanngorlugit tunniunneqassapput akiliinissamut piffissaliussap qaangiunnerani.</p>	<p>iluaqutaanngitsunik ingerlanneqareersimalerneranni, akileraaruseriffimmut akilersinniarneqartussanngorlugit tunniunneqassapput. Kommunini akiligassiissuteqartut, akiliinissamut piffissamut killigititaq ullunik 14-inik qaangerneqarpat, akiligassiissutit akileraaruseriffimmut akilersinniarneqartussanngorlugit tunniutissavaat.</p>
<p>(nutaaq)</p>	<p>12. § 11 g kingorna ilanngunneqarpoq: § 11 h. Allakkianik atsiorneqanngitsunik imaluunniit maskiinamik atsiorneri issuarneqarsimasunik imaluunniit taamaaqataanik periaaseqarfiusunik tunniussisarneq pillugu maleruagassanik Naalakkersuisut akiliisitsiniartarnermut suliaasaqarfimmi aalajangersaasinnaapput, taamaalilluni allakkiaq taamaattoq inatsisitigoortumik allakkiamut inummit atsiorneqarsimasumut sanilliunneqarsinnaassalluni.</p> <p>§ 11 i. Akiligassiissutip aningaasartaasa sinnerat 100 koruuniuppat annikinneruppalluunniit, akileraaruseriffiup akiligassiissut akiligassiisumut utertillugu tunniussinnaavaa.</p> <p><i>Imm. 2.</i> Kommunalbestyrelsit aamma Naalakkersuisut akiligassiissutitik 100 koruuninik annikinnerusunilluunniit aningaasartallit akilerneqanngitsut isumakkeerniarlugit aalajangersinnaapput.</p>
<p>§ 12, imm. 3: <i>Imm. 3.</i> Imm. 1-imi imaluunniit imm. 2-mi taaneqartut arlaat piginneqatigiiffimmit, peqatigiiffimmit, suliffeqarfik imminut</p>	<p>13. § 12, imm. 3, imatut oqaasertalerneqarpoq: <i>Imm. 3.</i> Inatsisartut inatsisai imaluunniit najoqqutassat Inatsisartut inatsisaa naapertorlugi aalajangersagaasut</p>

<p>pigisumit, aningaasaateqarfimmit assigisaanilluunniit unioqquatinneqarsimappata, taava inuttut inatsisitigut akisussaasuutinneqarsinnaasoq pillaammik akiliisussanngortinneqarsinnaavoq. Naalagaaffik, Namminersornerullutik Oqartussat, kommunit, imaluunniit kommunit suleqatigiiffiat unioqquטיםimappata, kommunalbestyrelsit nunaqarfinni aqutsisut il.il pillugit Inatsisartut inatsisaanni, § 64 naapertorlugu naalagaaffik, Namminersornerullutik Oqartussat, kommunalbestyrelsi imaluunniit kommunit suleqatigiiffiat, akisussaanermik pillaatissatut akiliisitaasinnaapput.</p>	<p>akiliisitsinissap aalajangersarnissaanut inatsimmi tunngavissaliisimappata, akiliisitsinissaq Kalaallit Nunaannut pinerluttulerinermut inatsimmi maleruagassat malillugit pisinnaatitaasumut pisussaatitaasumullu tutsinneqarsinnaavoq.</p>
---	--